

**Kalaallit ilinniagaqartut, ilinniarnissartik siunertaralugu nunanut allanut nuukkallarsimasut Inatsisartunut qinersinerni qinerseqataasalernissaasa sulissutigingasuarmissaat pillugu Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Andreas Rene Uldum, Demokraatit)

**Aappassaaneerneqarnera**

**Akissuteqaat**

(Nunamut Namminermt, Pinngortitamut Avatangiisinullu Naalakkersuisoq)

Naalakkersuisut Inatsisinut Ataatsimiititaliap isumaliutissiissutaanut qujassuteqarput.

Naalakkersuisut Inatsisinut Ataatsimiititaliap isumaliutissiissummi isummersuutaannut isumaqataapput.

Soorlu isumaliutissiissummi allassimasoq ataatsimiititaliap kissaatigivaa ukiamut Inatsisartut katersuunnissaannut Kalaallit Nunaanni Inatsisartunut qinersisarnernut Inatsisaanni maannamut atuuttumi § 20, imm. 5, allannguinissamik siunnersuummik Naalakkersuisut saqqummiussissasut imaalillugu sapaatip akunnerinik arfinilinnik periarfissiineq allanngortinneqarluni.

Tassungalu aamma atatillugu kalaallit ilinniartut Inatsisartunut qinersinissamut periarfissaannut aporfiusinnaasunik suli millisaanissaq siunertaralugu Naalakkersuisut qulaajaanermik suliaqarnertik ingerlatiinnassagaat Inatsisinut Ataatsimiititaliap Naalakkersuisut kaammatorpai.

Naalakkersuisut isumaliutissiissut tusaatissatut tiguaat, sulissutigiumallugulu 2012-imi ukiakkut katersuunnissamut sapaatip akunnerinik arfinilinnik killeqartitsineq sapaatit akunneri pingasunut allanngortinneqarnissaa, imaalillugu ilinniagaqartut Nunatta avataanut nuukkallarsimasut qinersisussat allassimaffiannut ilanngunneqarsinnaanerit piffissaqarnerulersillugu. Taamattaq kalaallit ilinniartut Inatsisartunut qinersinissamut periarfissaannut aporfiusinnaasunik suli millisaanissaq siunertaralugu qulaajaanermik Naalakkersuisut suliaqarnertik ingerlatiinnassavaat.

Taamaattorli siunnersuutip Inatsisartuni taasissutigineqarnissaanut atasumik Naalakkersuisut imaattumik ***allannguutissamik siunnersuuteqarput***:

Kalaallit ilinniagaqartut, ilinniarnissartik siunertaralugu nunanut allanut nuukkallarsimasut Inatsisartunut qinersinerni qinerseqataasartut amerlanerulernissaasa sulissutigineqarnissaa pillugu Naalakkersuisut peqquneqarnissaannik Inatsisartut aalajangiiffigisassaattut siunnersuut.

***Allannguutissatut siunnersuut*** agguaneqartoq Naalakkersuisut innersuussutigissavaat.

Taamatut Naalakkersuisut allannguutissamik siunnersuuteqarnerat taasissutigineqartussami kalaallisut oqaatsit atorineqartut erseqqinnerulersinniarnaqarput taamaalilluni oqaatsit kalaallisut danskisullu atorineqartut imminnut naapertuuttunngorlutik.